

Las dialas sin l'Alp da Munt



Foto DRG

Sin l'Alp da Munt da la vischnanca da Tschierv vivevan bleras dialas en cuvels sut la terra, che han anc uss num «Las Foras da las Dialas». Durant la stad vegnivan ellas savens or sin la prada e gidavan a far cun il fain, sa tegnend però in pau retratgas da la gliעד. Ellas purtavan vestgadira alva ed in bel faziel alv sin chau. Er durant l'onn, magari l'enviern cur ch'il sulegl splendoriva sin questa spunda, vegnivan ellas or a sulegl davant lur cuvels.

Sur dal svanir da las dialas datti duas ditgas differentas.

Las dialas e la laschiva

In bel di da stad, che quels da Tschierv faschevan cun il fain sin quell'alp, avevan las dialas fatg gronda laschiva e mess a sientar lur biancaria: chamischas, tuaglias e faziels, tut davant lur cuvels a su-

legl. Duas dunnas veglias fitg ranveras, a las qualas las dialas avevan fatg bler dal bain, eran gist là en la vischinanza e faschevan cun il fain. Plain scuidanza contemplavan ellas ils lenziels alvs sco la naiv, ed en lur engurdientscha han ellas decis d'engular ina part da quella bella rauba. Vi il suentermezdi, essend las dialas gist sa retratgas per in mument en lur cuvels, han las duas femnas fatg svanir ina buna part da la lavanda, han zuppà quella tranter il fain e manà la saira a chasa.

Ma l'autra damaun ha quai cumenzà a tunar ed a ramplunar en la grippa sut l'Alp da Munt, sco sche las paraids stuessan dar ensemen e sepulir ina part da la vischnanca. Las dialas èn svanidas cun tut lur ritgezzas, e nagin ha vis ellas pli. Ma las sgarschavlas sfessas en la grippa mussan anc ozendi tge revoluziun ch'ellas han fatg en l'intern dal munt avant che partir.

Las dialas ed ils giats

Sin l'Alp da Munt era in giuven paster, al qual ina da las dialas placheva ordvart bain. La saira, cur ch'el aveva finì sia lavur, sa zuppava el savens davos in grippun en la vischinanza dals cuvels da las dialas e spetgava sin quella. Mintga giada ch'ella vegniva or da sia dimora, persequitava el la diala, inqual giadas l'entira notg, fin ch'i sunava giu en vischnanca il zain da di, ma i na gartegiava mai al giuven da tschiffar quella.

Finalmain era la diala stufra da quest teater, ed ella ha dà da chapir al giuven, che sias fadias sajan invanas. Questa nova è ida ad el talmain a cor, ch'el ha cumenzà ad odiar la diala e pensar sin vendetga. El era vegnì a savair che las dialas avevan ina ferma aversiun cunter ils giats. E pelvaira, in di è el ì giu en vischnanca, ha prendì in giattun vegl, mess quel en in satg ed è turnà cun quel sin l'alp. La saira sin il far notg ha el bittà il giat en in dals cuvels, sperond da far cun quai in vaira snuizi a las dialas. Cument e satisfatg da sia ovra è el ì a durmir.

L'autra damaun han las dialas abandonà l'Alp da Munt e la Val, prendend cun ellas tut lur ritgezzas. Mo il giat han ellas laschà enavos. Anc ditg suenter udiva ins miaular quel sut la terra, e quai perfin giu en la val, en ils conturns da la vischnanca.